

# INUIT ATAQATIGIIT

## INATSISARTUNI



UKA 2013/78  
Mimi Karlsen

**Atuarfik pillugu Inatsisartut inatsisaat nr. 15, 3. December 2012-meersumi § 25, imm. 4-mi aamma § 36, imm. 1-mi aalajangersarneqartut naapertorlugit meeqqanut inuusuttunullu ineriikkiartornermikkut kingisissunut nerisaqarfiutigalugu atuarfittut immikkut ilusiligaasumik sulii ataatsimik pilersitseqqullugit ingeratseqqullugillu Naalakkersuisut peqquneqarnissaannik Inatsisartut aalajangiiffigisassaattut siunnersuut.**  
(Inatsisartuni ilaasortap Agathe Fontain, Inuit Ataqatigiit siunnersuutaa)

Inuit Ataqatigiinniit taperserparput Inatsisartunut ilaasortap Agathe Fontain-ip meeqqanut inuusuttunullu ineriikkiartornermikkut kingisissunut nerisaqarfiutigalugu atuarfittut immikkut ilusiligaasumik Naalakkersuisut pilersitsinissaannik siunnersuuteqarnera.

Nuna tamakkerlugu kommuninilu 2010-2012-mut atuartut aamma atuartut ingerlaqqinngitsut pillugit Inerisaaviup takutitassiaani atuarneqarsinnaavoq 2011-mi 10. klassini atuartut 846-usimasut, annertusisamik atuartinneqartut ilanngullugit. Taakkunannga atuartut 45-it immikkut annertusisamik atuartinneqarsimapput misilitsissimanatilli. Tassa atuaqatigiit marluk, pingasut amerlaqatigingajagaat.

Nunarput tamakkerlugu meeqqat 45-it ilinniarninnut ingerlaqqissinnaanngitsut sumut ingerlaqqissimanissaat takorlooruminaappoq.

FN-ip Nunarsuaq tamakkerlugu inuit pisinnaatitaaffiini Artikel 26-mi allassimavoq tunngaviusumik ilinniartitaaneq inuup pisinnaatitaaffigigaa. Aamma allassimavoq kinaluunniit atuartinneqarnissaminut pisinnaatitaaffeqartoq.

Atuartut 45-it immikkut annertusisamik atuartinneqarsimasut misilitsissimanatillu periarfissaqartittariaqarpagut ilinniarnissaannut, pingaarnerpaatullu: imminut napatissinnaallutik imaluunniit inuunermut nalinginnaasumut qaninnerpaamik inuusinnaanngorlutik inersimasunngornissaat anguniartuartaqarparput.

Taamaammat Nunatsinni Ado Lyngø Atuarfia kisiat isumalluutigisinnaajunnaarparput. Pilersitsisariaqarpugut meeqqat annertusisamik immikkut atuartinneqarsimasut misilitsittanngitsullu najugariitigalugu atuarfissaannik.

Meeqqat immikkut annertusisamik atuartinneqartarnerat assigiinngitsorpassuarnik patsiseqartarpoq. Atuartut ilaat ADHD, autisme allamilluunniit innarluuteqarsinnaapput. Taakkulu amerlanerit iluamik piareersakkamik ilinniartinneqarunik inersimasunngorunik suliffeqarsinnaasaraluarput, ilinniaqqittannginnerli peqqutigalugu ilaatigut siusinaartumik suliunnaarnersiuserneqarsinnaasarlutik.

Inuit Ataqatigiinni isumaqarpugut inuk innarluuteqartoq sapinngisamik imminut napatissinnaanissaa imaluunniit inuiaqatigiinni inuunermut nalinginnaasumut qaninnerpaamik inuuneqarluni inersimasunngornissaa anguniarneqartuartaqartoq.

Meeqqat immikkut annertusisamik atuartinneqarsimasut meeqqat atuarfiat qimakkaangamikku angajoqqaavisa assigiinngitsunik periarfissarsiortarpaat, arlallillu Danmarkimi eftererskolini periarfissarsituartarlutik.

Nunatsinni meeqqat immikkut atuartinneqarsimasut meeqqat atuarfianiit ingerlaqqiffeqartikkumallugit siunnersuuteqartoq Inuit Ataqatigiinniit taparserparput, siunnersuullu Kultureqarnermut Ilinniartitaanermullu ataatsimiitsitaliamut ingerlaqqinnissaa innersuussutigalugu.